


991106174

















白氏長慶集卷第二十六

唐太子少傅刑部尚書致仕贈尚書右僕射太原

白居易樂天著

明後學松江馬元調吳甫校

律詩

五言七言  
凡一百首

太和戊申歲大有年詔賜百寮出城觀稼謹書  
盛事以俟采詩

清晨承詔命豐歲閱田閭膏雨抽苗足涼風吐穗初  
早禾黃錯落晚稻綠扶疎好入詩家詠宜令史館書  
散爲萬姓食堆作九年儲莫道如雲稼今秋雲不如





贈悼懷太子挽歌辭二首

奉詔  
撰進

竹馬書臺歲銅龍表葬時永言窀穸事全用少陽儀壽  
夭由天命哀榮出聖慈恭聞褒贈詔軫念在與夷  
剪葉藩封早承華冊命尊笙歌辭洛苑風雪蔽梁園  
薄凌霜宿銘旌向月翻宮寮不逮事哭送出都門

雨中招張司業宿

過夏衣香潤迎秋簾色鮮斜支花石枕臥詠藥珠篇泥  
滓非遊日陰沉好睡天能來同宿否聽雨對牀眠

和集賢劉學士早朝作

吟君昨日早朝詩金御爐前喚仗時煙吐白龍頭宛轉



扇開青雉尾參差暫留春殿多稱屈合入綸闈卽可知  
從此摩霄去非晚鬢閒未有一莖絲

送陝州王司馬建赴任

建善詩者

陝西司馬去何如養靜資貧兩有餘公事閒忙同少尹  
料錢多少敵尚書祗攜美酒爲行伴唯作新詩趁下車  
自有鐵牛無詠者料君投刃必應虛

對琴待月

竹院新晴夜松牕未臥時共琴爲老伴與月有秋期玉  
軫臨風久金波出霧遲幽音待清景唯是我心知

楊家南亭



白集 卷三  
小亭門向月斜開滿地涼風滿地苔此院好彈秋思處  
終須一夜抱琴來

早寒

黃葉聚牆角青苔圍柱根被經霜後薄鏡遇雨來昏半  
卷寒簷幕斜開暖閣門迎冬兼送老只仰酒盈樽

齋月靜居

病來心靜一無思老去身閒百不爲忽忽眼塵猶愛睡  
些些口業尚誇詩葷腥每斷齋居月香火常親宴坐時  
萬慮消停百神泰唯應寂寞殺三尸

宿裴相公興化池亭

兼蒙借船  
舫遊汎



林亭一出宿風塵忘却平津是要津松閣晴看山色近  
石渠秋放水聲新孫弘閣閣無閒客傳說舟忙不借人  
何似掄才濟川外別開池館待交親

和劉郎中望終南山秋雪

遍覽古今集都無秋雪詩陽春先唱後陰嶺未消時草  
訝霜凝重松疑鶴散遲清光莫獨占亦對白雲司

廣府胡尚書頻寄詩因荅絕句

尚書清白臨南海雖飲貪泉心不回唯向詩中得珠玉  
時時寄到帝鄉來

送鶴與裴相臨別贈詩



司空愛爾爾須知不信聽吟送鶴詩羽翮勢高寧惜別  
稻梁恩厚莫愁飢夜棲少共雞爭樹曉浴先饒鳳占池  
穩上青雲勿回顧的應勝在白家時

令狐相公拜尚書後有喜從鎮歸朝之作劉郎  
中先和因以繼之

車騎新從梁苑回履聲珮響入中臺鳳池望在終重去  
龍節功成且納來金勒最宜乘雪出玉觴何必待花開  
尚書首唱郎中和不計官資只計才

送河南尹馮學士赴任

石渠金谷中間路軒騎翩翩十日程清洛飲冰添苦節



碧嵩看雪助高情謾誇河北操旄鉞莫羨江西擁旆旌

時新除二  
鎮節度

何侶府寮京令外別教三十六峯迎

讀鄂公傳

高臥深居不見人功名抖擻似灰塵唯留一部清商樂  
月下風前伴老身

賦得烏夜啼

城上歸時晚庭前宿處危月明無葉樹霜滑有風枝啼  
澀飢喉咽飛低凍翅垂畫堂鸚鵡鳥冷暖不相知

鏡換杯

欲將珠匣青銅鏡換取金樽白玉卮鏡裏老來無避處



樽前愁至有消時  
茶能散悶爲功淺  
萱縱忘憂得力遲  
不是杜康神用速  
十分一盞便開眉

冬夜聞蟲

蟲聲冬思苦於秋  
不解愁人聞亦愁  
我是老翁聽不畏  
少年莫聽白君頭

雙鸚鵡

綠衣整頓雙棲起  
紅觜分明對語時  
始覺琵琶絃莽鹵  
方知吉了舌參差  
鄭牛識字吾常歎

諺云鄭玄家牛觸墻成八字

丁

鶴能歌爾亦知  
若稱白家鸚鵡  
鳥籠中兼合解吟詩

贈朱道士



儀容白皙上仙郎方寸清虛內道場兩翼化生因服藥  
三尸臥死爲休糧醮壇北向宵占斗寢室東開早納陽  
盡日窓閒更無事唯燒一炷降真香

昨以拙詩十首寄西川杜相公相公亦以新作  
十首惠然報示首數雖等工拙不倫重以一  
章用伸答謝

詩家律手在成都權與尋常將相殊剪截五言兼用鉞  
陶鈞六義別開爐驚人卷軸須知有隨事文章不道無  
篇數雖同光價異十魚目換十驪珠

和令狐相公新於郡內栽竹百竿拆壁開軒旦



夕對翫偶題七言五韻

梁園修竹舊傳名久廢年深竹不生千畝荒涼尋未得  
百竿青翠種新成墻開乍見重添興牕靜時聞別有情  
煙葉蒙籠侵夜色風枝蕭颯欲秋聲更登樓望尤堪重  
千萬人家無一莖

汴州人家並無竹

重荅汝州李六使君見和憶吳中舊遊五首

爲憶娃宮與虎丘翫君新作不能休蜀牋寫出篇篇好  
吳調吟詩句句愁洛下林園終共住江南風月會重遊

先與李六有此二句之約

由來事過多堪惜何況蘇州勝汝州

李前刺蘇

州故有是句



見殷堯藩侍御憶江南詩三十首詩中多敘蘇

杭勝事余嘗典二郡因繼和之

江南名郡數蘇杭寫在殷家三十章君是旅人猶苦憶  
我爲刺史更難忘境牽吟咏真詩國興入笙歌好醉鄉  
爲念舊遊終一去扁舟直擬到滄浪

聞新蟬贈劉二十八

蟬發一聲時槐花帶兩枝只應催我老兼遣報君知白  
髮生頭速青雲入手遲無過一杯酒相勸數開眉

贈王山人

玉芝觀裏王居士服氣飡霞善養身夜後不聞龜喘息



秋來唯長鶴精神容顏盡怪長如故名姓多疑不是真  
貴重榮華輕壽命知君悶見世閒人

和劉郎中學士題集賢閣

朱閣青山高庠齊與君才子作詩題傍聞大內笙歌近  
下視諸司屋舍低萬卷圖書天祿上一條風景月華西  
欲知丞相優賢意百步新廊不蹋泥

觀幻

有起皆因滅無睽不暫同從歡終作感轉苦又成空次  
第花生眼須臾竹過風更無尋覓處鳥跡印空中

病假中龐少尹攜魚相過



宦情牢落年將暮，病假聯綿日漸深。  
被老相催雖白首，與春無分未甘心。  
閒停茶碗從容語，醉把花枝取次吟。  
勞動故人龐閣老，提魚攜酒遠相尋。

聽田順兒歌

戛玉敲冰聲未停，嫌雲不遏入青冥。  
爭得黃金滿衫袖，一時拋與斷年聽。

聽曹剛琵琶兼示重蓮

撥撥絃絃意不同，胡啼番語兩玲瓏。  
誰能截得曹剛手，插向重蓮衣袖中。

酬令狐相公春日尋花見寄六韻



病臥帝王州花時不得遊老應隨日至春肯爲人留粉  
壞杏將謝火繁桃向稠白飄僧院地紅落酒家樓空裏  
雪相似晚來風不休吟君悵望句如到曲江頭

和劉郎中曲江春望見示

芳景多遊客衰翁獨在家肺傷妨飲酒眼痛忌看花寺  
路隨江曲宮牆夾樹斜羨君猶壯健不枉度年華

送東都留守令狐尚書赴任

翠華黃屋未東巡碧洛青嵩付大臣地稱高情多水竹  
山宜閒望少風塵龍門卽擬爲遊客金谷先憑作主人  
歌酒家家花處處莫空管領上陽春



自題新昌居止因招楊郎中小飲

地偏坊遠巷仍斜最近東頭是白家宿雨長齊隣舍柳  
晴光照出夾城花春風小榼三升酒寒食深爐一碗茶  
能到南園同醉否笙歌隨分有些些

南園試小樂

小園斑駁花初發新樂錚鏦教欲成紅萼紫房皆手植  
蒼頭碧玉盡家生高調管色吹銀字慢拽歌詞唱渭城  
不飲一杯聽一曲將何安慰老心情

和微之春日投簡陽明洞天五十韻

青陽行已半白日坐將徂越國強仍大稽城高且孤利



饒鹽煮海名勝水澄湖牛斗天垂象台明地展圖

天台四明

二環奇填市井佳麗溢閭闔

當何切

句踐遺風霸西施舊

俗姝船頭龍天矯橋脚獸睚眦鄉味珍螳螂時鮮貴鷗

鵠語言諸夏異衣服一方殊搗練蛾眉婢鳴榔蛙角奴

江清敵伊洛山翠勝荆巫華表雙棲鶴聯牆幾點烏煙

波分渡口雲樹接城隅澗遠松如畫洲平水侶鋪綠科

秧早稻紫笋折新蘆暖蹋泥中藕香尋石上蒲雨來萌

盡達雷後蟄全蘇柳眼黃絲纈花房絳蠅珠林風新竹

折野燒

失照切

老桑枯帶韞

丁可切垂下貌

長枝蕙錢穿短貫榆

暄和生野菜卑濕長街蕪女浣紗相伴兒烹鯉一呼山



魑啼稚子林狖挂山都產業論蠶蟻孳生計鴨雛泉岩  
雪飄灑苔壁錦漫糊堰限舟航路堤通車馬途耶溪岼  
回合禹廟徑盤紆洞穴何因鑿星槎誰與剜石凹於交切  
仙藥曰峰峭佛香爐去爲投金簡來因挈玉壺貴仍招  
客宿健未要人扶問望賢丞相儀形美丈夫前驅駐旌  
旆偏坐列笙竽刺史旗翻隼尚書履曳鳬學禪超後有  
觀妙造虛無髻裏傳僧寶環中得道樞登樓詩八詠置  
硯賦三都捧擁羅將綺趨蹌紫與朱廟謨藏稷卨兵略  
貯孫吳令下三軍整風高四海趨千家得慈母六郡事  
嚴姑重士過三哺輕財抵一銖送觥歌宛轉嘲妓笑盧



胡佐飲時炮鼈燭醒數鱸鱸醉鄉雖咫尺樂事亦須臾  
若不中賢聖何由外智愚伊予一生志我爾百年軀江  
上三千里城中十二衢出多無伴侶歸只是妻孥白首  
青山約抽身去得無

酬鄭侍御多雨春空過詩三十韻

次用本韻

南雨來多沛東風動卽狂月行離畢急龍走召雲忙鬼  
轉雷車響蛇騰電策光浸淫天侶漏沮洳地成瘡慘淡  
陰煙白空濛宿霧黃闇遮千里目悶結九回腸寂寞羈  
臣館深沉思婦房鏡昏鸞滅影衣潤麝消香蘭濕難紉  
珮花凋易落粧沾黃鶯翅重滋綠草心長紫陌皆泥濘



黃污共祿茫恐霖成怪沴望霽劇禎祥楚柳腰肢躡

可丁

切

湘筠涕淚滂晝昏疑是夜陰盛勝於陽居士巾皆墊

行人蓋盡張跳蛙還屢出移蟻欲深藏端坐交游廢閒

行去步妨愁生垂白叟惱殺蹋青娘變海常須慮爲魚

慎勿忘此時方共懼何處可相將

此以下敘浙東政事

已望東溟

禱仍封北戶襪却思逢旱魃誰喜見商羊預怕爲蠶病

先憂作麥傷惠應施浹洽政豈假揄揚祀典修成秩農

書振滿牀丹誠期懇苦白口會昭彰賑廩賙飢戶苦城

備壞墻且當營歲事寧暇惜年芳德勝令災弭人安在

吏良尚書心若此不枉繫金章



和春深二十首

何處春深好春深富貴家馬爲中路鳥妓作後庭花羅  
綺驅論隊金銀用短車眼前何所苦唯苦日西斜  
何處春深好春深貧賤家荒涼三徑草冷落四隣花奴  
困歸傭力妻愁出貨車途窮平路險舉足劇衰斜

何處春深好春深執政家鳳池添硯水雞樹落花詔  
借當衢宅恩容上殿車延英開對久門與日西斜

何處春深好春深方鎮家通犀排帶胯瑞鶴勘袍花飛  
絮衝毬馬垂楊拂妓車戎裝拜春設左握寶刀斜

何處春深好春深刺史家陰繁榮布葉岐秀麥分花五



足鳴珂馬雙輪畫軾車和風引行樂葉葉隼旗斜

何處春深好春深學士家鳳書裁五色馬鬣剪三花蠟  
炬開明火銀臺賜物車相逢不敢揖彼此帽低斜

何處春深好春深女學家慣看溫室樹飽識浴堂花御  
印提隨仗香牋把下車宋家宮樣髻一片綠雲斜

何處春深好春深御史家絮縈驄馬尾蝶繞繡衣花破  
柱行持斧埋輪立駐車入班遙認得魚貫一行斜

何處春深好春深遷客家一杯寒食酒萬里故園花炎  
瘴蒸如火光陰走似車爲憂鵬鳥至只恐日光斜

何處春深好春深經業家唯求太常第不管曲江花折



桂名慙郅收螢志慕車官塲泥鋪處最怕寸陰斜

何處春深好春深隱士家野衣裁薜葉山飯晒松花蘭  
索紉幽珮蒲輪駐軟車林閒箕踞坐白眼向人斜

何處春深好春深漁父家松灣隨棹月桃浦落船花投  
餌移輕楫牽輪轉小車蕭蕭蘆葉裏風起釣絲斜

何處春深好春深潮戶家濤翻三月雪浪噴四時花曳  
練馳千馬驚雷走萬車餘波落何處江轉富陽斜

何處春深好春深痛飲家十分杯裏物五色眼前花鋪  
歡眠糟甕流涎見麴車中山一沉醉千度日西斜

何處春深好春深上巳家蘭亭席上酒曲洛岍邊花弄



水遊童棹湔裾小婦車齊撓爭渡處一匹錦標斜

何處春深好春深寒食家玲瓏鏤雞子宛轉綵毬花碧  
草追遊騎紅塵拜掃車鞦韆細腰女搖曳逐風斜

何處春深好春深博奕家一先爭破眼六聚鬪成花鼓  
應投壺馬兵衝象戲車彈碁局上事最妙是長斜

何處春深好春深嫁女家紫排襦上雉黃貼鬢邊花轉  
燭初移障鳴環欲上車青衣傳氍毹錦繡一條斜

何處春深好春深娶婦家兩行籠裏燭一樹扇閒花賓  
拜登華席親迎障幃車催粧詩未了星斗漸傾斜

何處春深好春深妓女家眉欺楊柳葉裙妬石榴花蘭



麝熏行被金銅釘坐車杭州蘇小小人道最天斜

詠家醞十韻

獨醒從古笑靈均長醉如今數伯倫舊法依稀傳自杜

杜康

新方要妙得於陳

陳郎中帖傳受此法

井泉王相資重九麴蘖

精靈用上寅

水用九月九日麴用七月上寅

釀糯豈勞炊范忝撒籩何

假漉陶巾常嫌竹葉猶凡濁始覺榴花不正真甕揭聞

時香酷烈餅封貯後味甘辛捧疑明水從空化飲似陽

和滿腹春色洞玉壺無表裏光搖金盞有精神能消忙

事成閒事轉得憂人作樂人應是世閒賢聖物與君還

往擬終身



鶴池二首

高竹龍前無伴侶，亂雞羣裏有風標。  
低頭乍恐丹砂落，晒翅常疑白雪消。  
轉覺鸕鷀毛色下，苦嫌鸚鵡語聲嬌。  
臨風一唳思何事，悵望青田雲水遙。

池中此鶴鶴，中稀恐是遼。  
東老令威帶雪松枝翹，膝脰放花菱片綴。  
毛衣低迴且向林閒宿，奮迅終須天外飛。  
若問故巢知處在，主人相戀未能歸。

對酒五首

巧拙賢愚相是非，何如一醉盡忘機。  
君知天地中寬窄，鵬鷃鸞皇各自飛。



蝸牛角上爭何事  
石火光中寄此身  
隨富隨貧且歡樂  
不開口笑是癡人

丹砂見火去無迹  
白髮泥人來不休  
賴有酒仙相暖熱  
松喬醉卽到前頭

百歲無多時壯健  
一春能幾日清明  
相逢且莫推辭醉

聽唱陽關第四聲

第四聲勸君更盡一杯  
酒西出陽關無故人

昨日低眉問疾來  
今朝收淚弔人回  
眼前流例君看取  
且遣琵琶送一杯

僧院花

欲悟色空爲佛事  
故栽芳樹在僧家  
細看便是華嚴偈



方便風開智慧花

老戒

我有白頭戒聞於韓侍郎老多憂活計病更戀班行鑠  
鑠誇身健周遮說話長不知吾免否兩鬢已成霜

洛橋寒食日作十韻

上苑風煙好中橋道路平蹴毬塵不起潑火雨新晴宿  
醉頭仍重晨遊眼乍明老慵雖省事春誘尚多情遇客  
踟躕立尋花取次行連錢嚼金勒鑿落寫銀罌府醞傷  
教送官娃喜要迎舞腰那及柳歌舌不如鶯鄉國真堪  
戀光陰可合輕三年過寒食盡在洛陽城



快活

可惜鶯啼花落處一壺濁酒送殘春  
可憐月好風涼夜一部清商伴老身  
飽食安眠消日月閒談冷笑接交親  
誰知將相王侯外別有優游快活人

送令狐相公赴太原

六纛雙旌萬鐵衣并汾舊路滿光輝  
青衫書記何年去紅旆將軍昨日歸  
詩作馬蹄隨筆走獵酣鷹翅伴觥飛  
北都莫作多時計再爲蒼生入紫微

不出

簷前新葉覆殘花席上餘盃對早茶  
好是老身銷日處



誰能騎馬傍人家

惜落花

夜來風雨急無復舊花林枝上三分落園中二寸深日  
斜啼鳥思春盡老人心莫怪添盃飲情多酒不禁

老病

晝聽笙歌夜醉眠若非月下卽花前如今老病須知分  
不負春來二十年

憶晦叔

遊山弄水攜詩卷看月尋花把酒盃六事盡思君作伴  
幾時歸到洛陽來



送徐州高僕射赴鎮

大紅旆引碧幢旌新拜將軍指點行戰將易求何足貴  
書生難得始堪榮離筵歌舞花叢散候騎刀槍雪隊迎  
應笑蹉跎白頭尹風塵唯管洛陽城

琴酒

耳根得聽琴初暢心地忘機酒半酣若使啟期兼解醉  
應言四樂不言三

聽幽蘭

琴中古曲是幽蘭爲我慙慙更弄看欲得身心俱靜好  
自彈不及聽人彈



六年秋重題白蓮

素房含露玉冠鮮  
紺葉搖風鈿扇圓  
本是吳州供進藕  
今爲伊水寄生蓮  
移根到此三千里  
結子經今六七年  
不獨池中花故舊  
兼乘舊日採花船

元相公挽詞三首

銘旌官重威儀盛  
騎吹聲繁鹵簿長  
後魏帝孫唐宰相  
六年七月葬咸陽

墓門已閉笳簫去  
唯有夫人哭不休  
蒼蒼露草咸陽隴  
此是千秋第一秋

送葬萬人皆慘澹  
反虞駟馬亦悲鳴  
琴書劒珮誰收拾



白集 卷三  
三歲遺孤新學行

臥聽法曲霓裳

金磬玉笙和已久牙牀角枕睡常遲  
朦朧閒夢初成後宛轉柔聲入破時  
樂可理心應不謬酒能陶性信無疑  
起嘗殘酌聽餘曲斜背銀釭半下帷

結之

歡愛今何在悲啼亦是空  
同爲一夜夢共過十年中

五鳳樓晚望

六年八月十日作

晴陽晚照濕煙銷五鳳樓高天沈寥  
野綠全經朝雨洗林紅半被暮雲燒  
龍門翠黛眉相對伊水黃金線一條



自入秋來風景好就中最好是今朝

寄劉蘇州

去年八月哭微之今年八月哭敦詩何堪老淚交流日  
多是秋風搖落時泣罷幾迴深自念情來一倍苦相思  
同年同病同心事除却蘇州更是誰

送客

病上籃輿相送來衰容秋思兩悠哉涼風嫋嫋吹槐子  
却請行人勸一盃

秋思

夕照紅於燒晴空碧勝藍獸形雲不一弓勢月初三鴈



思來天北砧愁滿水南蕭條秋氣味未老已深諳

酬夢得秋夕不寐見寄

碧簾絳紗帳夜涼風景清病聞和藥氣渴聽碾茶聲露  
竹偷燈影煙松護月明何言十里隔秋思一時生

題周家歌者

清緊如敲玉深圓似轉簧一聲腸一斷能有幾多腸

憶夢得

齒髮各蹉跎疎慵與病和愛花心在否見酒興如何年  
長風情少官高俗慮多幾時紅燭下聞唱竹枝歌

贈同座



春黛雙蛾嫩秋蓬兩鬢侵  
謀歡身太晚恨老意彌深  
薄解燈前舞尤能酒後吟  
花叢便不入猶自未甘心

夜招晦叔

庭草留霜池結冰黃昏鐘絕凍雲凝  
碧氈帳上正飄雪紅火爐前初炷燈  
高調秦箏一兩弄小花蠻榼二三升  
爲君更奏湘神曲夜就儂來能不能

戲荅皇甫監

時皇甫監  
初喪偶

寒宵勸酒君須飲君是孤眠七十身  
莫道非人身不煖十分一盞煖於人

和楊師臯傷小姬英英



自從嬌駭

魚駭切

一相依共見楊花七度飛玳瑁牀空收

枕席琵琶絃斷倚屏幃人閒有夢何曾入泉下無家豈  
是歸墳上少啼畱取淚明年寒食更沾衣

池邊卽事

氊帳胡琴出塞曲蘭塘越棹弄潮聲何言此處同風月  
薊北江南萬里情

聞樂感隣

老去親朋零落盡秋來絃管感傷多尚書宅畔悲隣笛  
廷尉門前歎雀羅綠綺窓空分妓女絳紗帳掩罷笙歌  
歡娛未足身先去爭奈書生薄命何



白氏長慶集卷第二十七

唐太子少傅刑部尚書致仕贈尚書右僕射太原  
白居易樂天著

明後學松江馬元調異甫校

律詩

五言七言凡九十首

戊申歲暮詠懷三首

窮冬月末兩三日半百年過六七時龍尾趨朝無氣力  
牛頭叅道有心期榮華外物終須悟老病傍人豈得知  
猶被妻兒教漸退莫求致仕且分司

唯生一女才十二祇欠三年未六旬婚嫁累輕何怕老



飢寒心慣不憂貧  
紫泥丹筆皆經手  
赤紱金章盡到身  
更擬踟躕覓何事  
不歸嵩洛作閒人

七年囚閉作籠禽  
但願開籠便入林  
幸得展張今日翅  
不能辜負昔時心  
人間禍福愚難料  
世上風波老不禁  
萬一差池似前事  
又應追悔不抽簪

贈夢得

心中萬事不思量  
坐倚屏風臥向陽  
漸覺詠詩猶老醜  
豈宜憑酒更麤狂  
頭垂白髮我思退  
脚蹋青雲君欲忙  
只有今春相伴在  
花前賸醉兩三場

想東遊五十韻

并序



大和三年春予病免官後憶遊浙右數郡兼思到越一  
訪微之故兩浙之間一物已上想皆在目吟且成篇不  
能自休盈五百字亦猶孫興公想天台山而賦之也

海內時無事江南歲有秋生民皆樂業地主盡賢侯郊  
靜銷戎馬城高逼斗牛平河七百里沃壤二三州

自常  
及杭

凡三  
百里

坐有湖山趣行無風浪憂食寧妨解纜寢不廢乘

流泉石諳天竺煙霞識虎丘

天竺虎丘寺領郡  
時舊遊最熟處

餘芳認

蘭澤遺詠思蘋洲

古詩云蘭澤多芳草又  
柳惲詩云汀洲採白蘋

菡萏紅塗粉

菰蒲綠潑油鱗差漁戶舍綺錯稻田溝紫洞藏仙窟玄

泉貯怪湫精神昂老鶴姿彩媚潛蚪

大謝詩云潛  
蚪媚幽姿

靜閱



天工妙閒窺物狀幽投竿出比目擲果下獼猴味苦蓮

心小漿甜蔗節稠橘苞從自結藕孔是誰鏤

先候切

逐日

移潮信隨風變棹謳迺夫交烈火候更次鳴騶梵塔形

疑踊

重玄閣

閶門勢欲浮

吳閶門

客迎攜酒榼僧待置茶甌

小宴閒談笑初筵雅獻酬稍催朱蠟炬徐動碧牙籌圓

盞飛蓮子長裾曳石榴柘枝隨畫鼓調笑從香毬幕颺

雲飄檻簾褰月露鉤舞繁紅袖去歌切翠眉愁絃管寧

容歇盃盤未許收良辰宜酩酊卒歲好優游鰕鱸鮮仍

細蓴絲滑且柔飽飧爲日計穩睡是身謀名愧空虛得

官知止足休自嫌猶屑屑衆笑大悠悠物表疎形役人



寰足悔尤蛾須遠燈燭鬼勿近且呆习世春來夢浮生  
水上漚百憂中莫入一醉外何求未死癡王湛無兒老  
鄧攸蜀琴安膝上周易在牀頭去去無程客行行不繫  
舟勞君頻問訊勸我少淹留

自此後並屬微之

雲雨多分散關

山苦阻修一吟江月別七見日星周

昔在杭州別微之微之留詩云明朝

又向江頭別月落潮平是去時

珠玉傳新什鵲鸞念故儔懸旌心宛轉

束楚意綢繆驛舫粧青雀官槽餽紫驪鏡湖期遠汎禹  
穴約冥搜預掃題詩壁先開望海樓飲思親履舄宿憶  
並衰稠志氣吾衰也風情子在不應須相見後別作一

家遊

吾衰子在並出家語



白集 卷二十一  
病免後喜除賓客

臥在漳濱滿十旬起爲商皓伴三人從今且莫嫌身病  
不病何由索得身

長樂亭畱別

灞滄風煙函谷路曾經幾度別長安昔時感促爲遷客  
今日從容自去官優詔幸分四皓秩祖筵慙繼二疎歡  
塵纓世網重重縛迴顧方知出得難

陝府王大夫相迎偶贈

紫微閣老自多情白首園公豈要迎伴我綠槐陰下歇  
向君紅旆影前行綸巾髮少渾疑反簪輦肩齊甚穩平



但問主人畱幾日分司賓客去無程

別陝州王司馬

笙歌惆悵欲爲別風景闌珊初過春爭得遣君詩不苦  
黃河岸上白頭人

將至東都先寄令狐留守

黃鳥無聲葉滿枝閒吟想到洛城時  
昔逢金谷三春盡恨拜銅樓一月遲  
詩境忽來還自得醉鄉潛去與誰期  
東都添箇狂賓客先報壺觴風月知

答崔十八見寄

明朝欲見琴樽伴洗拭金盃拂玉徽  
君乞曹州刺史替



我拋刑部侍郎歸倚瘡老馬收蹄立避箭高鴻盡翅飛  
豈料洛陽風月夜故人垂老得相依

贈皇甫賓客

輕衣穩馬槐陰路漸近東來漸少塵耳聞久憎聞俗事  
眼明初喜見閒人昔曾對作承華相今復連爲博望賓  
始信淡交宜久遠與君轉老轉相親

歸履道宅

驛吏引藤輦家童開竹扉往時多暫住今日是長歸眼  
下有衣食耳邊無是非不論貧與富飲水亦應肥

問江南物



歸來未及問生涯先問江南物在耶引手摩挲青石笋  
迴頭點檢白蓮花蘇州舫故龍頭閣王尹橋傾鴈齒斜  
別有夜深惆悵事月明雙鶴在裴家

蕭庶子相過

半日停車馬何人在白家慙慙蕭庶子愛酒不嫌茶

荅尉遲少尹問所須

乍到頻勞問所須所須非玉亦非珠愛君水閣宜閒詠  
每有詩成許去無

詠閒

但有閒銷日都無事繫懷朝眠因客起午飯伴僧齋樹



合陰交戶池分水夾階就中今夜好風月似江濶

同崔十八寄元浙東王陝州

未能同隱雲林下且復相招祿仕閒隨月有錢勝賣藥  
終年無事抵歸山鏡湖水遠何由汎棠樹枝高不易攀  
惆悵八科殘四在兩人榮闈兩人閒

荅蘇庶子月夜聞家僮奏樂見贈

墻西明月水東亭一曲霓裳按小伶不敢邀君無別意  
絃生管澀未堪聽

偶吟

里巷多通水林園盡不扃松身爲外戶池面是中庭元



氏詩三帙陳家酒一瓶醉來狂發詠隣女映籬聽

白蓮池汎舟

白藕新花照水開紅窓小舫信風迴誰教一片江南興  
逐我慙慙萬里來

池上卽事

行尋甃石引新泉坐看修橋補釣船綠竹挂衣涼處歇  
清風展簟困時眠身閒當貴真天爵官散無憂卽地仙  
林下水邊無厭日便堪終老豈論年

酬裴相公見寄二絕

習靜心方泰勞生事漸稀可憐安穩地捨此欲何歸



一雙垂翅鶴數首解嘲文揔是迂閒物爭堪伴相君

荅夢得聞蟬見寄

開緘思浩然獨詠晚風前人貌非前日蟬聲似去年槐  
花新雨後柳影欲秋天聽罷無他計相思又一篇

令狐尚書許過弊居先贈長句

不矜軒冕愛林泉許到池頭一醉眠已遣平治行藥逕  
兼教掃拂釣魚船應將筆硯隨詩主定有笙歌伴酒仙  
祇候高情無別物蒼苔石笋白花蓮

自題

老宜官冷靜貧賴俸優饒熱月無堆案寒天不趂朝傍



看應寂寞自覺甚逍遙徒對盈樽酒兼無愁可銷

荅崔十八

勞將白叟比黃公今古由來事不同  
我有商山君未見清泉白石在曾中

偶詠

禦熱蕉衣健扶羸竹杖輕誦經凭檻立  
散藥遶廊行暝槿無風落秋蟲欲雨鳴  
身閒當將息病亦有心情

荅蘇六

但喜暑隨三伏去不知秋送二毛來  
更無別計相寬慰故遣陽關勸一盃



白集  
卷二十七  
七  
秋遊

下馬閒行伊水頭  
涼風清景勝春遊  
何事古今詩句裏  
不多說著洛陽秋

偶作

張翰一杯酒榮期三樂歌  
聰明傷混沌煩惱污頭簪  
冷秋生早堦閒日上多  
近來門更靜無雀可張羅

遊平泉贈晦叔

照水容雖老登山力未衰  
欲眠先命酒暫歇亦吟詩  
且喜身無縛終慙鬢有絲  
迴頭語閒伴閒校十年遲

不出門



不出門來又數旬將何銷日與誰親鶴籠開處見君子  
書卷展時逢古人自靜其心延壽命無求於物長精神  
能行便是真修道何必降魔調伏身

歎鶴病

右翅低垂左脛傷可憐風貌甚昂藏亦知白日青天好  
未要高飛且養瘡

臨都驛送崔十八

勿言臨都五六里扶病出城相送來莫道長安一步地  
馬頭西去幾時

石後會知何處爲我今朝盡一杯

對鏡



白集  
卷二十七  
八  
三分鬢髮二分絲  
曉鏡秋容相對時  
去作忙官應太老  
退爲閒叟未全遲  
靜中得味何須道  
穩處安身更莫疑  
若使至今黃綺在  
聞吾此語亦分司

勸酒十四首

并序

予分秩東都居多暇  
日間來輒飲醉後輒吟  
苦無詞章不成謠詠  
每發一意則成一篇  
凡十四篇皆主於酒  
聊以自勸故以何處  
難忘酒不如來飲酒  
命篇

何處難忘酒七首

何處難忘酒  
長安喜氣新  
初登高第後  
乍作好官人  
省  
壁明張榜朝衣穩  
稱身此時無一盞  
爭奈帝城春



何處難忘酒天涯話舊情青雲俱不達白髮遞相驚二  
十年前別三千里外行此時無一盞何以敘平生

何處難忘酒朱門羨少年春分花發後寒食月明前小  
院迴羅綺深房理管絃此時無一盞爭過艷陽天

何處難忘酒霜庭老病翁聞聲啼蟋蟀乾葉落梧桐鬢  
爲愁先白顏因醉暫紅此時無一盞何計奈秋風

何處難忘酒軍功第一高還鄉隨露布半路授旌旄玉  
柱剝蔥手金章爛棋袍此時無一盞何以騁雄豪

何處難忘酒青門送別多斂襟收涕淚簇馬聽笙歌煙  
樹灞陵岸風塵長樂坡此時無一盞爭奈去畱何



何處難忘酒逐臣歸故園赦書逢驛騎賀客出都門半  
面瘴煙色滿衫鄉淚痕此時無一盞何物可招魂

不如來飲酒七首

莫隱深山去君應到自嫌齒傷朝水冷貌苦夜霜嚴漁  
去風生浦樵歸雪滿巖不如來飲酒相對醉厭厭

莫作農夫去君應見自愁迎春犁瘦地趁晚餽羸牛數  
被官加稅稀逢歲有秋不如來飲酒相伴醉悠悠

莫作商人去恓惶君未諳雪霜行塞北風水宿江南藏  
鎚百千萬沉舟十二三不如來飲酒仰面醉酣酣

莫事長征去辛勤難具論何曾畫麟閣祗是老轅門蟻



虱衣中物刀鎗面上痕不如來飲酒合眼醉昏昏

莫學長生去仙方悞殺君那將薤上露擬待鶴邊雲  
砭砭皆燒藥纍纍盡作墳不如來飲酒閒坐醉醺醺

莫上青雲去青雲足愛憎自賢誇智慧相糾鬪功能魚  
爛緣吞餌蛾焦爲撲燈不如來飲酒任性醉騰騰

莫入紅塵去令人心力勞相爭兩蝸角所得一牛毛且  
滅嗔中火休磨笑裏刀不如來飲酒穩臥醉陶陶

和令狐相公寄劉郎中兼見示長句

日月天衢仰面看尚淹池鳳滯臺鸞碧幢千里空移鎮  
赤筆三年未轉官別後縱吟終少興病來雖飲不多歡



白集 卷三  
酒軍詩敵如相遇臨老猶能一據鞍

卽事

見月連宵坐聞風盡日眠  
室香羅藥氣籠煖焙茶煙  
鶴啄新晴地雞棲薄暮天  
自看淘酒米倚杖小池前

期宿客不至

風飄雨灑簾帷故竹映松遮  
燈火深宿客不來嫌冷落  
一樽酒對一張琴

問移竹

問君移竹意如何慎勿排行  
但閒窠多種少栽皆有意  
大都少校不如多



重陽席上賦白菊

滿園花菊鬱金黃中有孤叢色似霜  
還似今朝歌酒席白頭翁入少年場

偶吟二首

眼下有衣兼有食心中無喜亦無憂  
正如身後有何事應向人間無所求  
靜念道經深閉目閒迎禪客小低頭  
猶殘少許雲泉興一歲龍門數度遊

晴教暇藥泥茶竈閒看科松洗竹林  
活計縱貧長淨潔池亭雖小頗幽深  
厨香炊黍調和酒牕暖安絃拂拭琴  
老去生涯祗如此更無餘事可勞心



何處春先到

何處春先到橋東水北頭  
凍花開未得冷酒着難醒  
就日移輕榻遮風展小屏  
不勞人勸醉鶯語漸丁寧

勉閒遊

天時人事常多故一歲春能幾處遊  
不是塵埃便風雨若非疾病卽悲愁  
貧窮心苦多無興富貴身忙不自由  
唯有分司官恰好閒遊雖老未能休

寄兩銀榼與裴侍郎因題二絕

貧無好物堪爲信雙榼雖輕意不輕  
願奉謝公池上酌丹心綠酒一時傾



慣和麴蘖堪盛否重用鹽梅試洗看小器不知容幾許  
襄陽米賤酒升寬

銀丘洗銀多以鹽花梅漿也

### 小橋柳

細水涓涓似淚流日西惆悵小橋頭  
衰楊葉盡空枝在猶被霜風吹不休

### 哭微之二首

八月涼風吹白幕寢門廊下哭微之  
妻孥朋友來相弔唯道皇天無所知

文章卓犖生無敵風骨英靈歿有神  
哭送咸陽北原上可能隨例作灰塵



馬上晚吟

人少街荒已寂寥  
風多塵起重蕭條  
上陽落葉飄宮樹  
中渡流澌擁渭橋  
出早冒寒衣校薄  
歸遲侵黑酒全消  
如今不是閒行日  
日短天陰坊曲遙

醉中重畱夢得

劉郎劉郎莫先起  
蘇臺蘇臺隔雲水  
酒盞來從一百分  
馬頭去便三千里

雪夜喜李郎中見訪兼酬所贈

可憐今夜鵝毛雪  
引得高情鶴氅人  
紅蠟燭前明似晝  
青氊帳裏暖如春  
十分滿盞黃金液  
一尺中庭白玉塵



對此欲留君便宿詩情酒分合相親

任老

不愁陌上春光盡亦任庭前日影斜  
面黑眼昏頭雪白  
老應無可更增加

勸歡

火急歡娛慎勿遲眼看老病悔難追  
樽前花下歌筵裏  
會有求來不得時

荅王尚書問履道池舊橋

虹梁鴈齒隨年換素板朱欄逐日修  
但恨尚書能久別  
莫愁州守不頻遊  
重移舊柱開中眼  
亂種新花擁兩頭



白集 卷二十一  
李郭小船何足問待君乘過濟川舟

晚歸府

晚從履道來歸府街路雖長尹不嫌馬上涼於牀上坐  
綠槐風透紫蕉衫

從龍潭寺至少林寺題贈同遊者

山屐田衣六七賢  
蹇芳蹋翠弄潺湲  
九龍潭月落杯酒  
三品松風飄管絃  
強健且宜遊勝地  
清涼不覺過炎天  
始知駕鶴乘雲外  
別有逍遙地上仙

夜從法王寺下歸嶽寺

雙刹夾虛空  
緣雲一徑通  
似從忉利下  
如過劒門中  
燈



火光初合笙歌曲未終可憐師子座昇出淨名翁

宿龍潭寺

夜上九潭誰是伴雲隨飛蓋月隨盃  
明年尚作三川守此地兼將歌舞來

嵩陽觀夜奏霓裳

開元遺曲自淒涼況近秋天調是商  
愛者誰人唯白尹奏時何處在嵩陽  
迴臨山月聲彌怨散入松風韻更長  
子晉少姨聞定怪人閒亦便有霓裳

過元家履信宅

雞犬喪家分散後林園失主寂寥時  
落花不語空辭樹



流水無情自入池風蕩

伊甸切

船初破漏雨淋歌閣欲

傾欹前庭後院傷心事唯是春風秋月知

和杜錄事題紅葉

寒山十月旦霜葉一時新似燒非因火如花不待春連  
行排絳帳亂落剪紅巾解駐籃輦看風前唯兩人

題崔常侍濟上別墅

時常侍以長告罷  
歸今故先報泉石

求榮爭寵任紛紛脫棄金貂祗有君散員疎去未爲貴  
小邑陶休何足云山色好當晴後見泉聲宜向醉中聞  
主人憶爾爾知否拋却青雲歸白雲

過溫尚書舊莊



白石清泉拋濟口碧幢紅旆照河陽村人都不知時事  
猶自呼爲處士莊

天壇峯下贈杜錄事

年顏氣力漸衰殘王屋中峯欲上難頂上將探小有洞

小有洞在天壇頂上

喉中須嚙大還丹

時杜方煉伏火砂次

河車九轉宜精

鍊火候三年在好看他日藥成分一粒與君先去掃天壇

贈僧五首

鉢塔院如大師

師年八十三登壇秉律凡六十年每歲於師處授入關戒

者九度



百千萬劫菩提種八十三年功德林若不秉持僧行苦  
將何報荅佛恩深慈悲不瞬諸天眼清淨無塵幾地心  
每歲八關蒙九授慇懃一戒重千金

神照上人

照以說壇  
爲佛事

心如定水隨形應口似懸河逐病治曾向衆中先禮拜  
西方去日莫相遺

自遠禪師

遠以無事  
爲佛事

自出家來長自在緣身一衲一繩牀令人見卽心無事  
每一相逢是道場

宗實上人

實卽樊司空之子  
捨官位妻子出家



榮華恩愛棄成唾戒定真如和作香今古雖殊同一法  
瞿曇拋却轉輪王

清閒上人

自蜀入洛於長壽寺說法度人

梓潼眷屬何年別長壽壇場近日開應是蜀人皆度了  
法輪移向洛中來

彈秋思

信意閒彈秋思時調清聲直韻疎遲近來漸喜無人聽  
琴格高低心自知

自詠

隨宜飲食聊充腹取次衣裘亦煖身未必得年非瘦薄



無妨長福是單貧老龜豈羨犧牲飽蟠木寧爭桃李春  
隨分自安心自斷是非何用問閒人

分司初到洛中偶題六韻兼戲呈馮尹

相府念多病春宮容不才官銜依口得俸祿逐身來  
白首林園在紅塵車馬迴招呼新客旅掃掠舊池臺  
小舫宜攜樂新荷好蓋盃不知金谷主早晚賀筵開

春風

春風先發苑中梅櫻杏桃梨次第開  
齊花榆莢深村裏亦道春風爲我來

白氏長慶集卷第二十七



白氏長慶集卷第二十八

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

律詩

五言七言凡一百首

洛陽春

洛陽陌上春長在昔別今來二十年  
唯覓少年心不得其餘萬事盡依然

恨去年

老去猶耽酒春來不着家  
去年來校晚不見洛陽花



早出晚歸

早起或因攜酒出晚歸多是看花迴若拋風景長閒坐  
自問東京作底來

魏王堤

花寒懶發鳥慵啼信馬閒行到日西何處未春先有思  
柳條無力魏王堤

嘗黃醅新酎憶微之

世閒好物黃醅酒天下閒人白侍郎愛向卯時謀洽樂

亦曾酉日放麤狂醉來枕麴貧如富

詩云一  
醉日富

身後堆金

有若亡元九計程殊未到甕頭一盞共誰嘗



勸行樂

少年信美何曾久春到雖遲不再逢歡笑勝愁歌勝哭  
請君莫道等頭空

老慵

豈是交親向我疎老慵自愛閉門居近來漸喜知聞斷  
免惱嵇康索報書

酬別微之

臨都驛  
醉後作

灋頭峽口錢塘岸三別都經二十年且喜筋骸俱健在  
勿嫌鬚鬢各皤然君歸北闕朝天帝我住東京作地仙  
博望自來非棄置承明重入莫拘牽醉收孟杓停燈語



寒展衾裯對枕眠猶被分司官繫絆送君不得過甘泉  
予與微之老而無子發於言歎著在詩篇今年  
各有一子戲作二什一以相賀一以自嘲

常憂到老都無子何況新生又是兒陰德自然宜有慶

于公陰德其後蕃昌

皇天可得道無知

皇天無知伯道無兒

一園水竹今爲

主

微之履信新居多水竹也

百卷文章更付誰

微之文集凡一百卷

莫慮鷄雛

無浴處卽應重入鳳凰池

五十八翁方有後靜思堪喜亦堪嗟一珠甚少還慙蚌  
八子雖多不羨鴉秋月晚生丹桂實春風新長紫蘭芽  
持盃祝願無他語慎勿頑愚似汝爺



自問

年來私自問何故不歸京佩玉腰無力看花眼不明老  
慵難發遣春病易滋生賴有彈琴女時時聽一聲

晚桃花

一樹紅桃亞

低也

拂池竹遮松蔭晚開時非因斜日無由

見不是閒人豈得知寒地生材造木食家養女嫁常  
遲春深欲落誰憐惜白侍郎來折一枝

夜調琴憶崔少卿

今夜調琴忽有情欲彈惆悵憶崔卿何人解愛中徽上  
秋思頭邊八九聲



阿崔

謝病臥東都羸然一老夫孤單同伯道遲暮過商瞿豈  
料鬢成雪方看掌弄珠已衰寧望有雖晚亦勝無蘭入  
前春夢桑懸昨日弧里閭多慶賀親戚共歡娛膩剃新  
胎髮香綳小繡襦玉芽開手爪酥顙點肌膚弓冶將傳  
汝琴書勿墜吾未能知壽夭何暇慮賢愚乳氣初離殼  
啼聲漸變鵝何時能反哺供養白頭烏

贈鄰里往還

問予何故獨安然免被飢寒婚嫁牽骨肉都盧無十口  
糧儲依約有三年但能抖擻人間事便是逍遙地上仙



唯恐往還相厭賤南家飲酒北家眠

王子晉廟

子晉廟前山月明人聞往往夜吹笙鸞吟鳳唱聽無拍  
多似霓裳散序聲

晚起

起晚憐春暖歸遲愛月明放慵長飽睡聞健且閒行北  
闕停朝簿西方入社名唯吟一句偈無念是無生

酬皇甫賓客

玄晏家風黃綺身深居高臥養精神性慵無病常稱病  
心足雖貧不道貧竹院君閒銷永日花亭我醉送殘春



自嫌詩酒猶多興若比先生是俗人

池上贈韋山人

新竹夾平流新荷拂小舟衆皆嫌好拙誰肯伴閒遊客  
爲忙多去僧因飯暫留獨憐韋處士盡日共悠悠

無夢

老眼花前闇春衣雨後寒舊詩多忘却新酒且嘗看拙  
定於身穩慵應趣伴難漸銷名利想無夢到長安

對小潭寄遠上人

小潭澄見底閒客坐開襟借問不流水何如無念心彼  
惟清且淺此乃寂而深是義誰能答明朝問道林



閒吟二首

留司老賓客春盡興如何  
官寺行香少僧房寄宿多  
閒傾一盞酒醉聽兩聲歌  
憶得陶潛語義皇無以過

閒遊來早晚已得一周年  
嵩洛供雲水朝廷乞俸錢  
長哥時獨酌飽食後安眠  
聞道山榴發明朝向玉泉

獨遊玉泉寺

三月三十日

雲樹玉泉寺肩昇

雲俱切

半日程更無人作伴  
祇共酒同行新葉千萬影  
殘鷺三兩聲閒遊竟未足  
春盡有餘情

晚出尋人不見

籃輦不乘乘晚涼  
相尋不遇亦無妨  
輕衣穩馬槐陰下



白集 卷三八  
五  
自要閒行一兩坊

苦熱

頭痛汗盈巾連宵復達晨不堪逢苦熱猶賴是閒人朝  
客應煩倦農夫更苦辛始慙當此日得作自由身

銷暑

何以銷煩暑端居一院中眼前無長物窓下有清風熱  
散由心靜涼生爲室空此時身自得難更與人同

行香歸

出作行香客歸如坐夏僧牀前雙草屨簷下一紗燈珮  
委腰無力冠欹髮不勝鸞臺龍尾道合盡少年登



同王十七庶子李六員外鄭二侍御同年四人

遊龍門有感而作

一曲悲歌酒一樽同年零落幾人存  
世如閱水應堪歎名似浮雲豈足論  
各從祿仕休明代共感平生知己恩  
今日與君重上處龍門不是舊龍門

池上小宴問程秀才

洛下林園好自知江南景物闇  
相隨淨淘紅粒鳥感切

香飯薄切紫鱗烹水葵雨滴蓬聲青雀舫  
浪搖花影白蓮池停盃一問蘇州客  
何似吳松江上時

橋亭卯飲



卯時偶飲齋時臥林下高橋橋上亭松影過窓眠始覺  
竹風吹面醉初醒就荷葉上包魚鮓當石渠中浸酒瓶  
生計悠悠身元元甘從妻喚作劉伶

舟中夜坐

潭邊霽後多清景橋下涼來足好風秋鶴一雙船一隻  
夜深相伴月明中

戲和微之荅竇七行軍之作

依本韻

旌鉞從橐鞬賓僚禮數全夔龍來要地鷁鷺下遼天赭  
汗騎驕馬青蛾舞醉仙合成江上作散到洛中傳陋巷  
能無酒貧池亦有船春裝秋未寄謾道有閒錢



閒忙

奔走朝行內棲遲林墅閒多因病後退少及健時還斑  
白霜侵鬢蒼黃日下山閒忙俱過日忙校不如閒

西風

西風來幾日一葉已先飛新霽乘輕履初涼換熟衣淺  
渠銷慢水疎竹漏斜暉薄暮青苔巷家僮引鶴歸

題西亭

多見朱門富貴人林園未畢卽無身我今幸作西亭主  
已見池塘五度春

觀游魚



遶池閒步看魚遊  
正值兒童弄釣舟  
一種愛魚心各異  
我來施食爾垂鉤

看採蓮

小桃閒上小蓮船  
半採紅蓮半白蓮  
不似江南惡風浪  
芙蓉池在臥牀前

看採菱

菱池如鏡淨無波  
白點花稀青角多  
時唱一聲新水調  
謾人道是採菱歌

天老

早世身如風裏燭  
暮年髮似鏡中絲  
誰人斷得人間事



少天堪傷老又悲

秋池

洗浪清風透水霜  
水邊閒坐一繩牀  
眼塵心垢見皆盡  
不是秋池是道場

登天宮閣

午時乘興出薄暮  
未能還高上煙中閣  
平看雪後山委形  
群動裏任性一生閒  
洛下多閒客其中我最閒

新雪二首

寄楊舍人

不思北省煙霄地  
不憶南宮風月天  
唯憶靜恭楊閣老  
小園新雪煖爐前



白集 卷三八  
不思朱雀街東鼓不憶青龍寺後鐘  
唯憶夜深新雪後  
新昌臺上七株松

日高臥

怕寒放懶日高臥臨老誰言牽率身  
夾幕繞房深似洞  
重裯襯枕暖於春  
小青衣動桃根起  
嫩綠醅鋪杯切浮竹  
葉新未裏頭前傾一盞何如衝雪趁朝人

和微之任校書郎日過三鄉

三鄉過日君年幾今日君年五十餘  
不獨年催身亦變  
校書郎變作尚書

和微之十七與君別及朧月花枝之詠



別時十七今頭白惱亂君心三十年垂老休吟花月句  
恐君更結後身緣

和微之歎槿花

朝榮殊可惜暮落實堪嗟若向花中比猶應勝眼花

思往喜今

憶除司馬向江州及此凡經十五秋雖在簪裾從俗累  
半尋山水是閒遊謫居終帶鄉關思領郡猶分邦國憂  
爭似如今作賓客都無一念到心頭

題平泉薛家雪堆莊

怪石千年應自結靈泉一帶是誰開  
感爲宛轉青蛇項



噴作玲瓏白雪堆赤日旱天長看雨玄陰臘月亦聞雷  
所嗟地去都門遠不得肩昇雲俱切每日來

和微之道保生三日

相看鬢似絲始作弄璋詩且有承家望誰論得力時莫  
興三日歎猶勝七年遲予老微之七歲我未能忘喜君應不合  
悲嘉名稱道保乞姓號崔兒但恐持相並蕭郎五樹枝

哭皇甫七郎中湜

志業過玄晏詞華似禰衡多才非福祿薄命是聰明不  
得人閒壽還留身後名涉江文一首便可敵公卿持正奇文

甚多涉異  
一章尤出



晚起

爛熳朝眠後頻伸  
晚起時煖爐生火  
早寒鏡裏頭遲融  
雪煎香茗調酥煮  
乳糜慵饒還自哂  
快活亦誰知酒性  
溫無毒琴聲淡不  
悲榮公三樂外仍  
弄小男兒

疑夢二首

莫驚寵辱虛憂喜  
莫計恩讐浪苦辛  
黃帝孔丘無處問  
安知不是夢中身  
鹿疑鄭相終難辨  
蝶化莊生詎可知  
假使如今不是夢  
能長於夢幾多時

夜宴惜別



笙歌旖旎曲終頭轉作離聲滿坐愁  
箏怨朱絃從此斷  
燭啼紅淚爲誰流夜長似歲歡宜盡  
醉未如泥飲莫休  
何況雞鳴卽須別門前風雨冷修修

歸來二周歲

歸來二周歲二歲似須臾池藕重生  
葉林鴉再引鷄時  
豐實倉廩春暖葺庖厨更作三年計  
三年身健無

吾土

身心安處爲吾土豈限長安與洛陽  
水竹花前謀活計  
琴詩酒裏到家鄉榮先生老何妨樂  
楚接輿歌未必狂  
不用將金買莊宅城東無主是春光



題岐王舊山池石壁

樹深藤老竹廻環石壁重重錦翠斑俗客看來猶解愛  
忙人到此亦須閒况當霽景涼風後如在千巖萬壑間  
黃綺更歸何處去洛陽城內有商山

病眼花

頭風目眩乘衰老祇有增加豈有瘳

傳云有加而無瘳

花發眼

中猶足怪柳生肘上亦須休大窠羅綺看纔辨小字文  
書見便愁必若不能分黑白却應無悔復無尤

早飲醉中除河南尹敕到

雪擁衡門水滿池溫爐卯後煖寒時綠醅新酎嘗初醉



黃紙除書到不知厚俸自來誠忝濫老身欲起尚遲疑  
應須了却丘中計女嫁男婚三逕資

除夜

病眼少眠非守歲老心多感又臨春火銷燈盡天明後  
便是平頭六十人

府西池

柳無氣力枝先動池有波紋冰盡開今日不知誰計會  
春風春水一時來

天津橋

津橋東北斗亭西到此令人詩思迷眉月晚生神女浦



臉波春傍窈娘堤柳絲嫋嫋風縈出草縷茸茸雨剪齊  
報道前驅少呼喝恐驚黃鳥不成啼

不准擬二首

藍輦騰騰一老夫褐裘烏帽白髭鬚早衰饒病多蔬食  
筋力消磨合有無不准擬身年六十上山仍未要人扶

又

憶昔謫居炎瘴地巴猿引哭虎隨行多於賈誼長沙苦

予自左遷江  
峽凡經七年

小校潘安白髮生不准擬身年六十遊春

猶自有心情

府中夜賞



櫻桃廳院春偏好石井欄堂夜更幽白粉墻頭花半出  
緋紗燭下水平流閒留賓客嘗新酒醉領笙歌上小舟  
舞袖颺颺棹容與忽疑身是夢中遊

府西池北新葺水齋卽事招賓偶題十六韻

繚繞府西面潺湲池北頭鑿開明月峽決破白蘋洲清  
淺漪瀾急寅緣浦嶼幽直衝行徑斷平入臥齋流石疊  
青稜玉波翻白片鷗噴時千點雨澄處一泓油絕境應  
難別同心豈易求少逢人愛翫多是我淹留夾岸鋪長  
簾當軒泊小舟枕前看鶴浴牀下見魚遊洞戶斜開扇  
疎簾半上鉤紫浮萍泛泛碧亞竹修修讀罷書仍展碁



終局未收午茶能散睡卯酒善消愁簷雨晚初霽窓風  
涼欲休誰能伴老尹時復一閒遊

哭崔兒

掌珠一顆兒三歲鬢雪千莖父六旬豈料汝先爲異物  
常憂吾不見成人悲腸自斷非因劍啼眼加昏不是塵  
懷抱又空天默默依前重作鄧攸身

初喪崔兒報微之晦叔

書報微之晦叔知欲題崔字淚先垂世間此恨偏敦我

敦音堆  
見詩注

天下何人不哭兒蟬老悲鳴拋蛻後龍眠驚覺

失珠時文章千帙官三品身後傳誰庇廕誰



府齋感懷酬夢得

時初喪崔兒夢得以詩相安云從此期君比瓊樹一枝吹

折一枝生故有此落句以報之

府伶呼喚爭先到家醞提攜動輒隨合是人生開眼日  
自當年老斂眉時丹砂鍊作三銖土玄髮看成一把絲  
勞寄新詩遠安慰不聞枯樹更生枝

### 齋居

香火多相對葷腥久不嘗黃耆數匙粥赤箭一甌湯厚  
俸將何用閒居不可忘明年官滿後擬買雪堆莊

### 與諸道者同遊二室至九龍潭作

喜逢二室遊仙子厭作三川守土臣舉首摩挲潭上石



開襟抖擻府中塵他日終爲獨往客今朝未是自由身  
若言尹是嵩山主三十六峯應笑人

履道池上作

家池動作經旬別松竹琴魚好在無樹暗小巢藏巧婦  
渠荒新葉長慈姑不因車馬時時到豈覺林園日日蕪  
猶喜春深公事少每來花下得踟躕

六十拜河南尹

六十河南尹前途足可知老應無處避病不與人期幸  
遇芳菲日猶當強健時萬金何假藉一盞莫推辭流水  
光陰急浮雲富貴遲人閒若無酒盡合鬢成絲



重修府西水亭院

因下疏爲沼隨高築作臺龍門分水入金谷取花栽遶  
岸行初匝憑軒立未廻園西有池位留與後人開

與諸公同出城觀稼

老尹醉醺醺來隨年少群不憂頭似雪但喜稼如雲歲  
望千箱積秋憐五穀分何人知帝力堯舜正爲君

水堂醉臥問杜三十一

聞君洛下住多年何處春流最可憐爲問魏王堤岸下  
何如同德寺門前無妨水色堪閒翫不得泉聲伴醉眠  
那似此堂簾幕底連明連夜碧潺湲



歲暮言懷

職與才相背心將口自言磨鉛教切玉驅鴈遣乘軒只  
合居巖窟何因入府門年終若無替轉恐負君恩

座中戲呈諸少年

衰容禁得無多酒秋鬢新添幾許霜縱有風情應淡薄  
假如老健莫誇張興來吟詠從成癖飲後酣歌少放狂  
不爲倚官兼挾勢因何入得少年場

雪後早過天津橋偶呈諸客

官橋晴雪曉栽栽老尹行吟獨一過紫綬相輝應不惡  
白鬚同色復如何悠揚短景周年急牢落衰情感事多



白集 卷三八 十五  
猶賴洛中饒醉客時時泥我喚笙歌

新製綾襖成感而有詠

水波文襖造新成綾軟繇勻溫復輕晨興好擁向陽坐  
晚出宜披蹋雪行鶴氅毳疎無實事木棉花冷得虛名  
宴安徃徃歡侵夜臥穩昏昏睡到明百姓多寒無可救  
一身獨暖亦何情心中爲念農桑苦耳裏時聞飢凍聲  
爭得大裘長萬丈與君都蓋洛陽城

早春雪後贈洛陽李長官鄭明府二同年

獻歲晴和風景新銅駝街郭暖無塵府亭共賀三川雪  
縣道分行百里春朱紱洛陽官位屈青袍長水俸錢貧



有何功德紆金紫若比同年是幸人

醉吟

醉來忘渴復忘飢冠帶形骸杳若遺  
耳底齋鐘初過後  
心頭卯酒未消時  
臨風朗詠從人聽  
看雪閒行任馬遲  
應被衆疑公事慢  
承前府尹不吟詩

府酒五絕

變法

自慙到府來  
周歲惠愛威稜  
一事無唯是改張  
官酒法  
漸從濁水作醍醐

招客



日午微風且暮寒春風冷峭雪乾殘碧氊帳下紅爐畔  
試爲來嘗一盞看

辨味

甘露太甜非正味醴泉雖潔不芳馨  
盃中此物何人別  
柔旨之中有典刑

自勸

憶昔羈貧應舉年脫衣典酒曲江邊  
十千一斗猶賒飲  
何況官供不著錢

諭妓

燭淚夜粘桃葉袖酒痕春汚石榴裙  
莫辭辛苦供歡宴



老後思量悔煞君

晚歸早出

筋力年年減風光日日新  
退衙歸逼夜拜表出侵晨  
何處臺無月誰家池不春  
莫言無勝地自是少閒人  
坐厭推囚案行嫌引馬塵  
幾時辭府印却作自由身

南龍興寺殘雪

南龍興寺春晴後緩步徐吟遶  
四廊老趺風花應不稱  
閒尋松雪正相當吏人引從多  
乘輦賓客逢迎少下堂  
不擬人閒更求事些些疎懶亦何妨

天宮閣早春



卷二十八  
一  
天宮高閣上何頻每上令人耳目新前日晚登緣看雪  
今朝晴望爲迎春林鶯何處吟箏柱墻柳誰家曬麴塵  
可惜三川虛作主風光不屬白頭人

履道居三首

莫嫌地窄林亭小莫厭貧家活計微大有高門鑲寬宅  
主人到老不曾歸

東里素帷猶未徹南鄰丹旆又新懸衡門蝸舍自慙愧  
收得身來已五年

世事平分衆所知何嘗苦樂不相隨唯餘耽酒狂歌客  
只有樂時無苦時



和夢得冬日晨興

漏傳初五點雞報第三聲帳下從容起窓閒矐矐

呼骨切

明照書燈未滅煖酒火重生理曲絃歌動先聞唱渭城

雪夜對酒招客

帳小青氊暖盃香綠蟻新醉憐今夜月歡憶去年人  
閨落燈花燼閒生草座塵慙慙報絃管明日有嘉賓

贈晦叔憶夢得

自別崔公四五秋因何臨老轉風流歸來不說秦中事  
歇定唯謀洛下遊酒面浮花應是喜歌眉斂黛不關愁  
得君更有無厭意猶恨樽前欠老劉



醉後重贈晦叔

老伴知君少歡情向我偏無論疎與數相見輒欣然各  
以詩成癖俱因酒得仙笑迴青眼語醉並白頭眠豈是  
今投分多疑宿結緣人間更何事攜手送衰年

睡覺

星河耿耿漏絲絲月闇燈微欲曙天轉枕頻伸書帳下  
披裘箕踞火爐前老眠早覺常殘夜病力先衰不待年  
五欲已銷諸念息世閒無境可勾牽

白氏長慶集卷第二十八



